

TROAD Y RHOD



Gardd yr haf ar Lyn Cwmorthin

Aeth blwyddyn gron
heibio ers y cam arloesol
o gyhoeddi gwerifyn
cyntaf Gwaith Maes
ddiwedd Tachwedd
llynedd, ac yn wir, mae
llawer o'n deunydd y tro
hwn ac iddo nodyn
tymhorol y misoedd, y
tywydd, ac adar ac
anifeiliaid sydd â
phatrwm eu bywyd yn
gaeth i gylch y tymhorau.

Ar ôl hen wanwyn diflas, tua diwedd Mai neu ddechrau Mehefin, byddech yn sicr o glywed fy mam yn gwneud y sylw gobeithiol "Falle daw'r t'wydd yn well 'da troad y rhod." Iddi hi a'i chyfoedion yng nghefn gwlad Sir Gaerfyrddin fel ym mhob rhan arall o Gymru, yr oedd cylch y flwyddyn yn rhan annatod o fywyd. Y drefn oedd gofalu am gael llwyth o lo i mewn cyn y gaeaf, a thaenu cwrlid ychwanegol ar y gwely pan ddeuai'r barrug cyntaf, nid cynnau'r gwres canolog mor ddiraffferth. Faint o blant heddiw sydd yn clywed gorfoledd côr y wawr bob gwanwyn trwy ffenestri gwydr dwbl eu llofft? Erbyn hyn mae'n rhy hawdd colli golwg ar galendr natur.



Celfyddyd y gaeaf ar y Bannau

Yn dilyn ein trefn arferol, symudwyd y rhan fwyaf o gynnwys y rhifyn blaenorol, sef Clawdd a Chae, i'r ffolderi priodol, ond cynhwysir darn Y Carlwm Gwyn eto yn y rhifyn newydd gan ein bod ar drothwy tymor gwynder y carlwm.

Sylwch hefyd ein bod wedi cadw'r gystadleuaeth ar agor tan ddiwedd Ebrill 2003 er mwyn rhoi mwy o gyfle i ysgolion yrru eu cynnyrch atom. Datblygiad newydd y tro hwn ydy cynnig cyfle i ddefnyddwyr Gwaith Maes gysylltu'n ryngweithiol ar y safwe ei hun (gweler y botwm CYSYLLTU) Bu'r cynllun hwn ar y gweyll o'r cychwyn, ond dim ond yn awr y mae'r cyllid gennym i'w wireddu. Yn ogystal â hyn, sefydlwyd nifer o gysylltiadau byw gyda nifer o gyrff a mudiadau sydd yn cydweithio â ni (gweler y botwm CYSYLLTIADAU) Felly, ar ddiwedd cylch blwyddyn lawn, mae'n braf cael dangos nad olwyn sydd yn troi yn ei hunfan yw Gwaith Maes ond un sydd yn symud ymlaen o hyd i gyfeiriadau newydd.

Rhifyn Nesaf
Mai 2003

Meira Shakespear